

古今岁时杂咏

(二)



辽宁教育出版社

古今岁时杂咏 (三)

〔宋〕蒲积中 编 徐敏霞 校点

新世纪万有文库

卷二十一

端 午

端午游真如迟适远从舍弟在酒局 苏轼

一与子由别，却数七端午。身随彩丝繁，心与昌歜苦。今年
疋马来，佳节日夜数。儿童喜我至，典衣具鸡黍。水饼既怀香，
饭筒仍感楚。谓言必一醉，快作西川语。宁知是官身，糟麴困薰
煮。独携一子出，古刹访禅祖。高谈付梁罗，诗律到阿虎。归来
一调笑，慰此长齟齬。梁罗迟适小名。

皇帝阁端午贴子六首

盛德初融后，潜阴天妒时。侍臣占易象，明作两重离。

彩秀擷芳群，争储百药良。太医初荐父，庶草验蕃昌。

微凉生殿阁，习习满皇都。试问吾民愠，南风为解无。

西槛新来玉宇风，侍臣茗盌得雍容。庭槐似识天颜喜，舞破
清阴作雨龙。

讲余交翟转回廊，始觉深宫夏日长。杨子江心空百炼，只将
无逸鉴兴亡。

一扇清风洒向寒，应缘飞白在冰纨。坐知四海蒙膏泽，沐浴
君王德似兰。

太皇太后阁六首

渐台通翠浪，暑殿转清风。帘卷东潮散，金乌未遽中。

日永蚕收簇，风高麦上场。朝来藉田令，菰黍献时芳。

舞羽诸羌伏，销兵万汇苏。只应黄纸诰，便是世灵符。

令节陈诗岁岁新，从君何以寿吾君。愿储医国三年艾，不作沉湘九辩人。

忠臣谅节令千岁，孝女孤风满四方。不复巫阳占郢梦，空余仲御扣河章。

长养恩深动植均，只忧贪吏尚残民。外廷已拜泉羹赐，应助吾君去不仁。

皇太后阁六首

露簟琴书冷，雕盘餽饔新。深宫犹畏日，应念暑耘人。

万寿昌蒲酒，千金琥珀杯。年年行乐处，新月挂池台。

翠筒初室栋，芡黍复缠菰。水殿开冰鉴，琼浆冻玉壶。

秘殿扶疏夏木深，雨余初有一蝉吟。应将羸女乘鸾扇，更助南风长棘心。

上林珍木暗池台，蜀产吴包万里来。不独盘中见卢橘，时于粽里得杨梅。

阙古遗风万古情，湘沉旧俗到金明。翠舆黄鹄何时幸，画鹤飞凫尽日横。

皇太妃阁五首

午景帘栊静，春风草木酣。谁知恭俭德，彩缕出亲蚕。

雨洒方梅夏，风高已麦秋。应怜百花尽，绿叶暗红榴。

辟兵已佩灵符小，续命仍紫彩缕长。³不为祈禳得天助，要随风俗乐时康。

玉盆沉李艳清泉，金鸭嘘空袅细烟。自有梧桐韩畏日，仍欣姜黍报丰年。

良辰乐事古难同，绣茧采丝奉两宫。仁孝自应穰百沴，艾人桃印本无功。

夫人阁四首

肃肃槐庭午，沉沉玉漏稀。皇恩乐佳节，斗草得珠玑。

节物荆吴旧，嬉游禁掖闲。仙风随画屐，拜赐落人间。

五彩萦筒秫稻香，千门结艾鬓髯张。旋开筵典寻风物，要反灵辰共祲禳。

欲晓铜瓶下井栏，铿锵金殿发清寒。似闻人世南风热，日上墙东问几竿。

皇帝阁四首

楚国因谗逐屈原，终身无复入君门。愿因角黍词遗俗，可鉴前王感巧言。

喜辰共喜沐兰汤，毒沴何须采艾禳。但得皋夔调鼎鼐，自然灾祲变休祥。

香菰黏米著佳名，古俗相传岂足矜。天子明堂遵月令，含桃初荐黍新登。

圣主忧勤政治平，仁风惠泽被群生。自然四海归文德，何用灵符号避兵。

郡王阁五首

风光细细飘香转，绿叶阴阴覆槛凉。云物鲜明时节丽，水精宫殿侍君王。

蓬莱仙阙彩云中，端午欣逢岁岁同。皎洁霜纨空咏扇，空沉玉宇自生风。

古今风俗记佳辰，乐事深宫日日新。巧女金盘丝五色，皇家玉历寿千春。

凉生玉宇来内细，日永金徒报漏稀。皎洁冰壶清水殿，三千争捧赭黄衣。

仙盘冷泛银河露，细扇香摇绿蕙风。禁掖自应无暑气，瑶台金阙水精宫。

皇帝阁六首

天清槐露浥，岁熟麦风凉。五目标佳节，千龄献寿觞。
午位星标正，人间令节同。四时和玉烛，万物被薰风。
舜舞来遐俗，尧仁浹九区。五兵消以德，何用赤灵符。
天容清水昼，风色秀含薰。五日逢佳节，千龄奉圣君。
彩索盘中结，杨梅粽里红。宫闱九重乐，风俗万方同。
宝曲禀灵日，明离正午方。五行当火德，万寿续天长。

太皇太后阁五首

渐台通翠浪，暑殿转清风。帘卷东朝散，金乌未遽中。
密叶花成子，新巢燕引雏。君心多感旧，谁献辟兵符。
旭日映帘生，流晖耀艳明。红颜易零落，何异此花荣。
香黍筒为粽，灵苗艾作人。芳音邈已远，节物自常新。

珠箔凉飏入，金壶昼刻长。鸾台尘不动，销尽故时香。

皇后阁四首

画扇催迎暑，灵符喜辟邪。风光丽宫禁，时节重仙家。
椒塗承茂渥，娉壺范柔仪。更以亲蚕茧，纫为续命丝。
茧馆覆茱桑，新丝引更长。纫为五色缕，续寿献君王。
槐绿阴初合，榴繁艳欲燃。翠筒传角黍，嘉节庆年年。

夫人阁五首

梅黄初过雨，麦实已登秋。避暑多佳赏，皇欢奏豫游。
鸣蝇惊早夏，斗草及良辰。共献菖蒲酒，君王寿万春。
楚俗传筒黍，江人喜竞船。深宫亦行乐，彩索续长年。
冰壶凝皓彩，水殿漾轻涟。绣茧夸新巧，紫丝喜续年。
黄金仙杏粉，赤玉海榴芳。共斗今朝胜，盈檐百草香。

皇帝阁十三首

夏竦

续命朱丝登茧馆，长生金篆献琳宫。百灵拱卫天居峻，万国欢康帝业隆。

命缕开辰分五色，长丝献寿祝千年。垂衣日月承嘉庆，真祖飏游正在天。

仙园彩药回雕辇，禁殿迎祥启凤闱。四海乐康民富寿，穆清无事永垂衣。

采丝祝寿芳辰启，紫禁凝旒瑞日长。亿兆归仁天祐德，绵绵真荫永无疆。

绛台月笔书金篆，紫殿瑶箱献巧衣。亿载延鸿资睿算，百祥重沓拥宸闱。

太官角黍迎嘉节，正圣斋居袭美祥。金阙鉴观真绪远，永延鸿庆庇多方。

尚方绶带迎嘉节，中禁彤闱纳美祥。畴德珍符方瑞圣，后宫宸美永无疆。

太官角黍初晨启，法座垂衣介福隆。亿载昌期方奕奕，九天真荫永延鸿。

赐羹佳序传青简，续寿长丝献紫宸。帝祉滂彰符盛德，圣心勤恤为生民。

五色彩丝初献寿，九重嘉气颂长生。庇民精志方虔巩，垂拱仁风更穆清。

浴兰袭芷良辰启，握纪无为圣道尊。天启嘉祥充紫禁，冲融和气遍千门。

八龙焜耀长生篆，五色葳蕤续命丝。亿载延长资睿算，万区康乐遇昌期。

岁时节令多休宴，风俗灵辰重祓禳。肃穆皇居百神卫，涤邪宁待浴兰汤。

皇太后阁十四首

迎祥近献双条达，续寿初缠五色丝。共仰斋庄隆内训，永观蕃衍茂仙枝。

群治水嬉飞隼渡，瑶箱命缕采丝新。亲蚕礼毕无余事，风佩璫璜奉紫宸。

千门朱索迎嘉祉，九禁椒塗纳美祥。虔奉黼帷承渥惠，永闻彤史播声芳。

六宫点画呈新巧，中壺斋明顺吉辰。德迈河洲芳训茂，庆隆祺石美祥新。

千门袭吉紫朱索，九禁开晨斗紫闱。宫漏正长天眷重，永宣

芳训率三妃。

日记采兰追楚俗，化孚流苻调周诗。肃恭懿德垂彤瑱，九御归心百福宜。

中闱正肃鸣环节，吉日爰逢采术时。亿载繁禧同圣寿，百男鸿庆茂仙枝。

点画诸官初献巧，裁逢中禁久迎祥。周南永播河洲化，仰佐鸿明烛万方。

覆槛午阴黄鸟啭，烘帘晓日绛榴繁。六宫彩缕争新巧，共续千年奉至尊。

紫兰浙浙风光转，绿叶阴阴禁院凉。天子万几多暇日，喜逢佳节奉瑶觞。

五色双丝献女功，多因荆楚记遗风。圣君照物同天鉴，不用江心百炼铜。

烟含玉树风生细，日永宫花漏出迟。深殿未尝知暑气，水精帘拂碧琉璃。

玉壶冰彩映寒光，避暑宸游乐未央。采艾不须攘毒沴，塗椒自己馥清香。

兰苕擢秀迎风紫，槿艳繁开照日红。嘉节相望传有旧，深宫行乐自无穷。

温成皇后阁四首

彩缕谁云能续命，玉奁空自琐遗香。白头旧监悲时节，珠阁无人夏日长。

依依节物旧年光，人去花开益可伤。圣主聪明无色惑，不须西国返魂香。

闻说仙家事杳微，世传真伪岂能知。遥思海上三山乐，宁记人间五日时。

云散风流岁月迁，君恩曾不减当年。非因掩面留遗爱，自为难忘窃窈贤。

淑妃阁四首

葵宾布序逢良月，条达延祥纪令辰。仰奉椒塗宣内治，永昭芳誉冠虞嫔。

芳园踏草迎嘉节，紫掖鸣环奉鞠衣。渥惠日新鸿庆远，永隆徽序耀层闱。

万寓清和当圣日，千门采拾达良辰。上真鸿绪宜蕃衍，从此高谋美应新。

宴寝奉阙鸣来玉，良辰袞庆袞长丝。仰窥中壶垂芳裕，永播周南逮远词。

郡王阁四首

对日惠心时共仰，沐兰嘉节庆长丝。仰承中绪隆天爱，永奉祥祺袞太熙。

彤闱永奉千年庆，金策将封一字王。伫向景风承异渥，豫从佳节纳多祥。

五色彩丝颁禁殿，千龄嘉庆集藩房。玉堂弦诵依真馆，日日灵心降美祥。

昆山瑞玉题真篆，阆苑蟠桃刻印文。并献春闱延美庆，亿年喜气永氤氲。

御阁圣旨进

晏殊

沐浴兰汤在此辰，内园仙境物华新。轻丝五彩缠金缕，共祝尧年寿万春。

初垂彩仗迎新节，复结香茅致百祥。就日望云皆善祝，圣人洪算与天长。

献寿竞为长命缕，迎祥还佩赤灵符。端门漏永晨曦上，飒飒秋风绕帝梧。

雕盘角黍竞时宜，组绣风华奉紫闱。海日乍升丹禁晓，文人晴影照金扉。

内 廷四首

百草斗余欣令月，五丝紫后祝遐年。洞房风暖垂灵艾，神沼波深竞彩船。

披风别殿地无尘，辟恶灵符字有神。九子粽香仙醴熟，共瞻宸极祝千春。

由来佳节载南荆，一浴兰汤万虑清。仙苑此时收百药，炼丹飞石保长生。

一一雕盘分楚粽，重重团扇画秦娥。宫闱百福逢嘉序，万户千门喜气多。

升 阁二首

朱邸沐兰逢令节，丹廷祝寿喜嘉辰。两宫荣养延多庆，百福潜随命缕新。

织组文缯载旧仪，晨朝丹扆奏天慈。六斋清素来多福，岁岁今辰侍宴私。

御 阁四首

五彩丝长系臂初，万年芳树影扶疏。岂劳方士撰神篆，自有

真灵卫帝居。

九子粽新传楚俗，赤灵符验出新方。汉宫尽祝如天寿，鹊尾炉烟起瑞香。

乍结香茅祈福寿，更缠金缕贡芳新。丹台素有延生策，岁岁迎祥在此辰。

仙家既有灵符术，越俗兼为竞渡游。三十六宫迟日永，绮窗朱户彩云浮。

东 宫 阁二首

杨子波心铸鉴成，俗传兹日最標灵。宣猷视学通文史，问膳多欢奉帝廷。

百药初收味最良，玉函仍启太清方。扇裁葵叶风频度，漏转金门日更长。

端 午 作

汨渚沉沉不可追，楚人犹自吊湘累。灵均未免争琼糈，却道蛟龙畏色丝。

端午日帖子词

皇 帝 阁六首

孙 规

薰琴应律南风暖，漏箭添筹昼刻长。谁识广寒天上景，铜乌未午送微凉。

炎日曛曛照殿楹，幅员万里塞氛清。汉家自有安边术，不是灵符解辟兵。

方更仲律清和节，正是南讹化育时。无限元元齐歌舞，恤刑
新诏天下墀。

露碗擷兰苕，金波丽碧霄。早闻彤鞶降，还待紫宸朝。
内苑属嘉辰，初收百药新。预知氛病息，天意在生民。
浅圃含桃老，雕盘角黍香。九重端扆处，星火正离方。

皇后阁五首

蟠桃映砌晨烟薄，紫桂凌霄昼露晞。窈窕汉宫三十六，齐将
彩缕祝坤闾。

暑服初颁五柞宫，内墀佳气郁葱葱。须知海宇升平事，半是
关雎辅佐功。

方均宝笈千龄药，又赐金盘五色瓜。从此仙源深福远，绵绵
不独颂周家。

浴兰同故事，戏草楚遗风。不是天家意，勤劳念女红。
洞户花阴浅，天阶日景迟。棕成八九子，缕结就千丝。

夫人阁五首

杳杳画梁巍架杏，沉沉香壁静塗椒。宫前夜祝君王寿，日上
黄炉炷未消。

交飞寿斝长生殿，竞泛仙舟太液池。不似世间多暑气，天风
淅淅万年枝。

辟恶何须荆楚艾，蠲炎不待邵平瓜。仙飈昨夜来闾阖，玉宇
清凉大帝家。

画阁方裁扇，寒塘又凿冰。蓬壶山四彻，何处是炎蒸。
仙宇赐符时，仙蕝叶尚稀。晓来金屋静，同侍玉皇归。

端 午 日 三 首

梅尧臣

有酒不病饮，况无菖蒲根。空怀楚风俗，角黍吊沉魂。
佳人五色缕，道士绛囊符。瘦臂不中系，百邪何用驱。
百草堪为药，舟行不及收。岸傍萧与艾，从听到寒休。

五 月 五 日

屈氏已沉死，楚人哀不容。何当奈谗谤，徒欲却蛟龙。未泯生前眼，而追没后踪。沅湘碧潭水，应自照千峰。

重五观竞渡

南方多竞渡，多在屈平祠。箫鼓满流水，风烟生画旗。千桡速飞鸟，两舸刻灵螭。尽日来江畔，谁知轻薄儿。

午日与陈直卿饮

午日逢南国，三年别旧都。招魂传楚客，抚节见灵巫。蒿艾因时未，蛟龙为俗驱。清樽与鹅炙，忻此故人俱。

端午前保之太傅遗水墨扇及酒

画扇双酒壶，置前兵吏立。言将国匠奇，重以风义执。树石水上看，山河月中入。使持菖蒲饮，不畏青蝇及。

端午晚得菖蒲

薄暮得菖蒲，犹胜竟日无。我焉能免俗，三揖向尊壶。

端午同子宣平岚榭晚酌望南山而有作

张无尽

相见长嗟相聚稀，平岚色榭对清晖。牛羊遍野草初绿，槐柳成阴春已归。顶上茹生麋角解，嘴边黄尽燕雏飞。白头共作天涯客，几向南山咏式微。

端午献扇

纨扇新成献迺翁，草堂虚寂起清风。欲知妙用真无有，不离而今掌握中。

端午偶题

孤忠不屈赴湘流，甘与龙逢地下游。若共蛟龙争口食，何如附会楚王休。

端午观竞渡题北榭

龙舟鼓笛和吴歌，彩索缠筒吊汨罗。交腿千人齐举棹，岂知河海有风波。

重午晚登县城景气殊异忽如晓光覆映海色而停云
积藓点缀其间皆成物象天地之奇变也

崔正言

颓云敛夕阴，落日送归鸟。初愁山河暝，忽见海光晓。长洲带清浅，翠阜环深渺。绵绵沙树远，点点浮峦小。起我天际意，便欲凌浩渺。风蒲挂色远，鸿鹄共轻矫。十年堕尘土，爪发今已稿。妙物本无心，何乃调此老。惊呼初未定，散灭俄稍稍。亦以观我生，惆怅下城杪。

端午书事

白子仪

火云方炽又风薰，谁柅天边午日轮。靖郭所生为贵子，灵均以死作忠臣。朝衣耻立鸡争地，宾帷难量狗盗人。休语前书忧喜事，浴兰角黍是良辰。

端午日无菖蒲

余安行

端午日已过，更吟端午诗。人间好时节，寂寞强追惟。有酒无菖蒲，青粽漫累累。昔人固所嗜，我今莫荐之。薄物尚如此，翻思泪交垂。

谢张仲谋端午送巧作

黄鲁直

君家玉女从小见，闻道如今画不成。剪裁似借天女手，萱草石榴偏眼明。

卷二十二

夏至

夏至避暑北池

韦应物

昼晷已云极，宵漏自此长。未及施政教，所忧变炎凉。公门日多暇，是月农稍忙。高居念田里，苦热安可当。亭午息群物，独游爱方塘。门闭阴寂寂，城高树苍苍。绿筠尚含粉，圆荷始散芳。于焉洒烦抱，可以对华觞。

夏至日作

权德舆

璿极无停运，四序相错行。寄言赫曦景，今旦一阴生。

夏至日衡阳郡斋书怀

令狐楚

一来江城守，七见江月圆。齿发将六十，乡关越三千。褰帷罕游观，闭阁多沉眠。新节还复至，故交尽相捐。何时捃闾阖，上诉高高天。

和梦得夏至忆苏州呈卢宾客

白居易

忆在苏州日，常谕夏至筵。粽香筒竹嫩，炙脆子鹅鲜。水国